



Schnitzelbank 1992

Fasnachtsgesellschaft Muotathal

Guet Tag midenand lär liäbä Lüt,
lär sind üs herzlich willkommä hüt.
lär wettid wieder wüssä was ds letscht Jahr isch glaufä,
das cha jedä vernäh, wänn är tuäd ä Schnitzelbank chaufä.

Wenn einä scho dr Wäg i das Blettli innä duet gfindä,
so muess är wägedem nu witniänä afä spinnä.
Da drinä näm miär jedä, isch är gross oder chlii,
isch im Riäd vor oder im Bisisthal innä gsii.

Im Hinterthal hends ä schöni Chilbi ghaa,
äs het det änu Flitzer umäghaa,
usset dä Beizä heigids gwarded uf Wiibli,
agha hends wedr Hämmlä, Hosä nu Liibli.

Äs sind au gsi äs par Muotithaler Buebä,
wo hend wellä uf Bukarescht ga Tschutä luägä,
is Stadion inä hends aber nüd chönnä,
diä Freud hendnä d'Rumänä nüd mögä gönä.

Bim Klavierspilä isch är zimli kuhl,
einersmal ischär worde gottlos fuhl,
afä schlafä hed är wäredum spilä,
är hät halt nu meh söllä is Glas inä schilä.

Metrologä hend ä schönä Verein,
öppis isch gsi fura Presidänt ä Pein,
grad zwee Musägä hed är gorganisiärt,
si hend aber nur bi einerä topäliärt.

Gschlafä hed inerä Wirtschaft ä starchä Purscht,
wonär erwachät isch, hedr fura gnu si Wurscht,
wämä alls aaluägt, hedrs glich nu guät preicht,
är hed ämal wenigstents käs Näscht verseicht.

Ga schaffä gand nüd all glich gärä,
hür gläbi nüd liäbr wedr färä,
zwee hend midänand afä umäzausä,
einä hed duä gmacht ä Wuchä Pausä.

Ä jungä Purscht hed mid eim chönnä uf Luzärä,
det apä wär är scho lang einisch gärä,
dr eltr Kolleg heig det aber afä Spinnä,
der Purscht hed duä Polizii müässä hei bringä.

D Asylantä im Staldä tüänd gärä telefoniärä,
drum hends am Apperat afä manipuliärä,
öppä 15 Tuusig Frankä hends äso chönnä schparä,
üseren hättids rati scho gnu ächli harä.

Wänn einä ä schöni Schiitur wott machä,
sött au Zunnä hinderum Bärg fürä lachä,
äs wär susch ganz ä schönä Tag gsii,
nur Schuä hedr ä keini gha drbii.

Ä guätä Jeep muäs mä kännä,
mä söttä nüd durä Schnee durä zwängä,
im schönschtä innä isch är blibä stah,
ufnä VW Golf hedersi aber chönnä verlah.

Midumä Laschtwagä cha nüd jedä fahrä,
ei Schofför isch zimli wiit ussä anä gfahrä,
z'usstigä heds duä nümme ärlittä,
är heds duä erscht gmerkt wonr tuät im See innä liggä.

Bidä Fischer sött mä scho öppä einisch Kontrollä machä,
susch fands nu ob dä Kontrollörä afä lache,
idä Hosä und im Tschoopä hedr käni Fisch gha,
villicht hedr id Stiful öppä ä Chäsfisch ta.

Amä Gmeindrat hed einä gottlos wüäscht gseid,
Maffiaboss hed der Amtsmäa nüd vertreid,
midärä Entschuldigung ischr duä drfoh cho,
dma einä hät rati ä gsalzni Rächnig übercho.

Als Wirt söttmä nüd inä anderer Beiz ga Spinnä,
äso duäd mä käni nü Gescht gwinnä,
är hed det amä Gascht im Ässä gnüält,
dr Andr hedums duä ächli a Grind anä grüärt.

Wämr scho bim Ässä sind, tuäts passä,
wänn Zweek mid dä Bis tüänd gschpassä,
si hends allig widr is Biär inä taa,
und grad widr einisch ds lätz im Muul innä gha.

Midum Laschtwagä hedr is Ussland müässä,
är heds abr adr Gränzä müässä büässä,
bidr Frachtkontrollä heds müässä sii,
susch wär dr Schlüssul nüd ufäm Fuädr obä gsii.

Am Grümpulturniär tuäd au allerhand laufä,
Bettr chamä det ä keini chauffä,
Schlaf hed der gha zimli ä gsundä,
imä Gool innä hedr si Nachtruä gfundä.

Amä Schälläli hed einä d'Chraft usgläa,
das hed är mid Gwalt wellä verschläa,
är hed duä widr einisch dr näbäd ghauä,
nachr äso verschlagnig Händ müässä gschauä.

Einä hed wellä uf Hochdorf apä Chnächt,
das isch adä Eltärä gsi medä rächt,
äbä zum Gschauä hendsä ä nüd wellä,
nach zwee Tagä hends däheimä widr chönnä ufnä zellä.

Ga Triichlä im Riäd söttids am Driikönigstag,
ich weiss nüd öb det jedä zwee Chlopfä mag,
diä Frömdä sind si gsii gläbi nüd ghörig gwännt,
am Nüjahr sind susch d'Rietr im Elemänt.

Im Uusgang isch gsi ä Garaschischt,
autofahrä hedr wellä midärä bsundärä Lischt,
hindä innä heds käs Zündschloss gha,
är hed duä müässä ä Reiä wiitr fürä gah.

Zwee Puurä sind ufärä Sumpftur gsi,
Z'Veh däheimä ischnä gliichgültig gsii,
dr Eint hed Polizie chönnä hei männä,
dr Andr hends nüd brungä vom Biär dännä.

Midumä Gwehr sött mä nüd umähandiärä,
susch chönnt dä nu ä Umfall passiärä,
ä Knall heds gäh und dr Schuss isch durs Dach,
der Riätr Schützämeischer wär susch vom Fach.

Wämä ä Hilfspolizischt tuäd neckä,
chasäs gäh das mä sälber tuäd idr Suppä schtecke,
d'Autonummärä hedärum demontiärt,
nachr im Poliziiposchtä obä deponiärt.

Im Schwarzstock obä gsehts ächli schittr uus,
da chömid nümmä all ghörig druus,
Gfahr hends vor drissg Jahr scho ärchännt,
abr äbä, Gäld niid niämr gärä id Händ.

Färä hend einisch ä paar durägmacht,
diä Fahrt uf Gänf isch gsii zwenig durchdacht,
ufdr Autobahn hed duä z'Auto nümmä wellä,
si hend 10 Litr Sprit für 150 Frankä chönnä bschtellä.

Ä Beizer hed Parkplatzproblem gha,
sogar dr eigi Brüädr hedum si Platz nüd chönnä lah,
genau det anä hed müässä ä Biegä Holz,
äso zeigdmä am Brüädr am beschtä si Stolz.

Einä tuäds zimli lang im Uusgang ärliedä,
drum tuädr um andärä Tag Ärbed miedä,
idr Buubaraggä isch är gsi abum Wind,
gschlafä hedr midum Töffhelm am Grind.

A eim hed Pfrau zimli guät wellä,
si hed dänkt, ich tuänem zwei Paar Hosä bschtellä,
är hed abr gha a eim Paar gnuäg,
drum hedr a disäm midärä Schäri uusglah si Wuät.

Will dr Wundernas tuäd regiärä,
hend sich diä Frauä müässä blamiärä,
äs ischnä färä nüd ghörig gratät,
z'Hochsig hed z'Villgau und nüd im Bisisthal ghüratät.

Wämä dä Wintr tuäd pfluägä,
muäs mä eistr ächli luägä,
im Riäd ussä hed alls luägä nüd gnützt,
är isch am gliichä Tag zweimal i Bach apägschtützt.

Arbät gid äso ä Schnitzulbank z'dichtä.
d'Lüüt wüssid dma au ee öpis z'brichtä.
I dr Fasnacht söttmä aber äs Gschpässli ärliidä,
suscht tuäd mä um beschtä däheimä blibä.

Soo, ich glaubä äs täts jetzt wieder fümäs Jahr,
das wo miär gseid hend isch mee oder mindr wahr.
Wänn einä meint är chöns bessär bringä,
dä chanär z'nächscht Jahr ä guhälfä singä.